

** Den kaso di diferensia entre e vershonnan na papiamentu i hulandes di e areglo di supsidio, e teksto original na hulandes ta e vershon vigente.*

Areglo Literatura Karibe

Direktiva di Nederlands Letterenfonds,

teniendo kuenta ku e disposishon den e Lei general di derecho atministrativo,

teniendo kuenta ku artíkulo 10, insiso 4 di Lei pa maneho kultural spesífiko,

teniendo kuenta ku e Areglo general di Nederlands Letterenfonds

ta disidí:

Artíkulo 1. Definishon

E areglo akí ta usa e siguiente terminologia:

direktiva: e direktiva di Letterenfonds;

Letterenfonds: Stichting Nederlands Letterenfonds;

Parti karibense di Reino: e paisnan Aruba, Kòrsou, Sint Maarten i e tres entidatnan públiko Boneiru, Saba i Sint Eustatius;

kreadó literario: un persona natural establese den e parti karibense di Reino ku tin e profeshon òf ku tin ambishon pa ta aktivo komo profeshonal den kreashon òf tradukshon di literatura;

literatura: kreashon literario na hulandes, ingles, fries, papiamentu, papiamento òf e idioma di seña hulandes, òf tradukshon di esaki;

kreashon literario: un obra original, literario;

organisashon: un entidat hurídiko sin fin di lukro establese den e parti karibense di Reino ku ta inskribí na un di e Kámaranan di Komèrsio den e parti karibense di Reino, komo un organisashon kultural supsidia òf no-supsidia òf komo un otro entidat hurídiko ku ta aktivo den e sektornan kultural;

proyekto: tur aktivitat nesenario pa un aktivitat literario òf trayekto pa desaroyo di talento pará riba su mes, i spesífikamente definí, limitá den tempu i den propósito;

ingles: e idioma ingles manera e papiadónan nativo ta papia esaki den e parti

karibense di reino;

papiamentu: papiamentu i papiamento.

Artíkulo 2. Meta

Ku e areglo akí, Letterenfonds su meta ta pa oumentá e proposishonnan literario den e parti karibense di Reino, partikularmente esnan na papiamentu. Banda di esei, Letterenfonds ke fortalese e infrastruktura literario einan tambe i sostené trayekto pa desaroyo di talento.

Artíkulo 3. Aktivitat pa kua por apliká pa supsidio

Por apliká pa supsidio solamente pa proyekto den e siguiente kategorianan:

- kreashon di obra literario;
- desaroyo di talento;
- aktivitat literario.

Artíkulo 4. Rekesito pa ta aplikante

1. E únikonan ku por apliká pa supsidio ta:

- kreadó literario;
- organisashon.

Artíkulo 5. Base pa nenga un aplikashon

Lo nenga un aplikashon pa supsidio en todo kaso si:

- e aplikante òf e aplikashon no ta kumpli ku loke tin stipulá den e areglo akí;
- un proyekto anterior ku e aplikante akí mes a risibí un supsidio p'e bou di e areglo akí no a finalisá ainda;
- e aplikante a risibí òf ta bai risibí un supsidio bou di un otro areglo di Letterenfonds kaba pa e aktividatnan pa kua e ta aplikando pa un supsidio bou di e areglo akí;
- e aktividatnan tin un karakter ekstríktamente sientífiko òf ta pa krea material di lès.

Artíkulo 6. Periodo pa aplikashon, sistema di alokashon i montante máksimo di supsidio

1. E periodo pa aplikashon ta kore for di e dia despues ku e areglo akí sali den korant di gobièrnu, Staatscourant, te 1 di novèmber 2024 òf promé ku e dia ei mes, si a yega e montante máksimo di supsidio kaba. Riba su website, Letterenfonds lo anunsiá ora ku surpasá e montante máksimo di supsidio.
2. Lo trata e aplikashonnan segun e sekuensia den kua nan a dreña.
3. Segun artíkulo 11 insiso 5 di e Areglo General, ta konsiderá e dia ku Letterenfonds risibí e petishon kompleto, komo e fecha di resepsion.
4. E montante máksimo di supsidio pa 2024 ta €300.000. Lo anunsiá kualke kambio den e montante akí den Staatscourant i riba e website di Letterenfonds.
5. Yanüari di kada aña lo publiká e montantenan máksimo di supsidio pa aña 2025 i despues i e fechanan di kuminsamentu i kabamentu di e periodonan di aplikashon den e añanan ei, riba e website di Letterenfonds i den Staatscourant.

Artíkulo 7. Rekesito pa aplikashon

1. Pa entregá un petishon pa supsidio mester usa un formulario di aplikashon ku Letterenfonds a krea pa e areglo akí.
2. Lo prosesá un petishon únikamente si e formulario di aplikashon ta kompletamente yená, firmá i kompañá pa e siguiente aneksonan:
 - a. un plan di proyekto digital (video òf oudio) òf por eskrito ku ta kumpli ku e rekisitonan den e formulario di aplikashon;
 - b. un presupuesto detayá di e proyekto, por eskrito, inkluyendo splikashon.
3. Mester entregá e aplikashon den un di e siguiente idiomanan: hulandes, papiamentu, ingles, fries òf e idioma di seña hulandes.
4. No por entregá un petishon ku a keda rechasá a base di e kriterionan di evaluashon menshoná den artíkulo 9 di nobo pa e mes proyekto.

Artíkulo 8. Montante di e supsidio i durashon di e proyekto

1. E supsidio ta yega un máksimo di € 25.000 pa aplikashon pa un kreadó literario i un máksimo di € 50.000 pa un organisashon.
2. Un proyekto mester finalisá den un periodo máksimo di 1 aña despues ku a otorgá e supsidio.

Artíkulo 9. Kriterio di evaluashon

1. Lo evaluá tur aplikashon segun e siguiente kriterionan:
 - a. plan di proyekto;
 - b. balor agregá di e proyekto pa e islanan;
 - c. profil di aplikante;
 - d. kalidat di redakshon / selekshon di obra / guia / kolaborashon;
 - e. grupo di enfoke i forma di aserká públiko (si ta relevante);
 - f. presupuesto (a base di e malchi di Letterenfonds).
2. Pa por otorgá e petishon, e evaluashon di tur e kriterionan apliká mester ta positivo.

Artíkulo 10. Konseho

1. Ta presentá un aplikashon ku ta bin na remarke pa evaluashon di kontenido na por lo ménos un konsehero eksterno.
2. E konsehero eksterno ta evaluá e aplikashonnan a base di e kriterionan di evaluashon menshoná den artíkulo 9 i ta duna konseho si mester otorgá e supsidio i e montante di e supsidio.

Artíkulo 11. Desishon

Direktiva ta informá e aplikante di su desishon por eskrito denter di 22 siman despues di a risibí e aplikashon kompleto.

Artíkulo 12. Deber di esun ku risibí e supsidio

1. E direktiva ta obligá esun ku risibí e supsidio pa:

- a. realisá e aktividatnan pa kua a otorgá e supsidio i no gasta e supsidio na otro aktividat;
- b. duna Letterenfonds informashon korekto i real na tur momentu;
- c. inkluí nòmber i logo di Letterenfonds den tur komunikashon públiko relashoná ku e aktividatnan supsidia;
- d. invitá Letterenfonds na tempu pa partisipá den kualke aktividat públiko pa kua a otorgá supsidio;
- e. esun ku risibí e supsidio no violá derecho di outor di un terser partido;
- f. esun ku risibí e supsidio koperá ku investigashon kondusí pa òf na nòmber di Letterenfonds pa duna Letterenfonds informashon pa e por desaroyá maneho.

2. Esun ku ta risibí e supsidio mester notifiká e direktiva mas pronto posibel por eskrito di kualke situashon ku por ta relevante pa un desishon pa kambia, retirá òf determiná e supsidio. Ademas, lo entregá e dokumentonan relevante pa esaki. Lo notifiká esaki sigur, si ta probabel ku:

- a. no a realisá e aktividatnan pa kua a otorgá e supsidio ainda, no a realisá nan na tempu òf no a realisá nan kompletamente òf lo no realisá nan mes, òf
- b. no ta kumpli, no ta kumpli na tempu òf no ta kumpli kompletamente òf ku lo no kumpli ku e obligashonnan di supsidio, òf
- c. a konosé kambio supstansial kompará ku e informashon entregá na Letterenfonds ora ku a hasi e petishon den kuadro di otorgamentu òf determinashon di supsidio, òf si a surgi kambio pa loke ta trata ehekushon di e proyekto kompará ku e plan òf sirkunstansia spesial ku lo por surgi.

3. Esun ku risibí e supsidio ta duna Letterenfonds pèrmit pa publiká òf reproducí (partinan di) e relato di proyekto òf otro dokumentashon di e proyekto (inkluso material visual) den kuadro di responsabilisashon di e trabounan di Letterenfonds, sin ku ta duna un kompensashon na esun ku risibí e supsidio òf na un posibel di tres persona ku derecho.

4. Letterenfonds por imponé un obligashon riba esun ku risibí e supsidio pa:

- a. garantisá ku e atministrashon di e aplikante ta duna un bista eksakto i komplemento di e aktividatnan supsidia i ta konsistente ku e presupuesto entregá huntu ku e aplikashon;
- b. warda e dokumentonan di sosten ku ta pertenesé na e atministrashon, ku ta demostrá klaramente e naturalesa i alkanse di e aktividatnan eligibel, pa por lo ménos shete aña despues ku a determiná e supsidio;
- c. esun ku risibí e supsidio koperá òf pa e sòru pa su accountant koperá ku investigashon relashoná ku su trabou (di ouditoria), ku un partido apuntá pa e direktiva di Letterenfonds lo realisá. Ta konsiderá ku e gastunan asosiá ta inkluí den e supsidio.

Artíkulo 13. Otorgamentu, determinashon i pago di supsidio te ku € 25.000

1. Lo determiná otorgamentu di supsidio te ku € 25.000 inmediatamente despues di e otorgamentu.

2. Lo paga e montante stipulá na e aplikante denter di ocho siman.

Artíkulo 14. Otorgamentu, pago adelantá i determinashon di supsidio ku ta surpasá € 25.000

1. Den kaso di supsidio ku ta surpasá €25.000, lo paga e aplikante den forma di un adelanto den un plaso di ocho siman.

2. Resipiente di un supsidio ku ta surpasá €25.000 mester entregá un hustifikashon pa loke ta e kontenido, inkluyendo, si ta nesario, un deklarashon di gastu i entrada real, den un plaso di tres luna despues di fin di e proyekto.

3. Pa supsidio ku ta surpasá €25.000 ta konta ku, si a realisá e aktividatnan manera pidí den e aplikashon i a kumpli ku tur obligashon di supsidio, esun ku risibí e supsidio mester entregá un petishon pa un desishon di determinashon di supsidio denter di 13 siman despues di a kompletá e aktividatnan pa kua a otorgá e supsidio. E direktiva lo emití e desishon di determinashon di supsidio denter di 22 siman despues di e petishon.

Artíkulo 15. Motibu pa revoká i kambia otorgamentu i determinashon di supsidio

1. E direktiva por revoká òf kambia otorgamentu òf determinashon di e supsidio si esun ku risibí e supsidio no a kumpli ku e obligashonnan mará na e supsidio.

2. Si e direktiva konstatá ku tabatin kambio supstansial kompará ku e informashon suministrá den e petishon, e direktiva por revoká òf kambia otorgamentu òf determinashon di e supsidio.

3. Si e aplikante ta un persona natural, e direktiva ta outorisá pa kambia òf revoká otorgamentu òf determinashon di e supsidio pa motibu di fayerementu di e aplikante. Lo no baha otorgamentu òf determinashon di e supsidio ku e partinan di e supsidio òf adelanto ku a paga kaba, a ménos ku den un regulashon parsial a stipulá otro.

4. E revokashon òf kambio tin efekto retroaktivo te na e momentu ku a otorgá òf determiná e

supsidio, a ménos ku ta determiná otro na momento di revokashon òf kambio.

5. Lo kompensá kualke redukshon den e montante di supsidio ku kualke parti di e supsidio ku a paga òf rekuperá kaba. Si esun ku risibí e supsidio no a kumpli ku e obligashon di raportahe menshoná den artíkulo 12, insiso 2, e direktiva por stipulá e supsidio na sero i reklamá e montante di supsidio, inkluyendo e interes statutario ku debe.

Artíkulo 16. Klóusula di difikultat

Teniendo cuenta ku e interes ku e areglo akí ke protehá, e direktiva por deskonsiderá un artíkulo òf desviá di dje si aplikashon estrikto lo kondusí na un inhustisia di un índole signifikante.

Artíkulo 17. Provishon final

E direktiva lo tuma desishon den tur kaso ku no ta stipulá den e areglo akí.

Artíkulo 18. Entrada na vigor

E areglo akí ta drenta na vigor riba e dia despues di e fecha di publikashon di e Staatscourant den kua esaki ta publiká i ta kaduká dia 31 di desèmber 2028. Komo eksepsion riba e promé frase, e areglo akí, segun e vershon vigente riba e dia promé ku e fecha di ekspirashon di e areglo akí, lo sigui konta pa e areglonan entregá i e supsidionan otorgá bou di e areglo akí.

Artíkulo 19. Título pa sitashon

Por sita e areglo akí komo: Areglo Literatura Karibe.

Lo publiká e areglo akí ku aklarashon den e Staatscourant.

AKLARASHON

E Areglo Literatura Karibe ta un areglo di insentivo spesial pa kreadó i organisashon literario den e parti karibense di Reino. Meta di e areglo ta pa sòru pa por lesa i tende historia, poema i presentashon literario original di i na e pais- òf islanan ampliamente. En partikular, Letterenfonds ke pa e kantidat di literatura na papiamentu i papiamento ku ta ofresé ta muchu mas. Banda di esei, e fondo ta enfoká riba inisiativa ku ta fortalese e infrastruktura literario den e parti karibense di Reino. Ku otro palabra, inisiativa ku ta kontribuí na un klima (di lesamentu) literario ku oportunidat struktural pa eskritor i traduktor sigui profeshonalisá, pa publiká nan obra literario — den forma di buki, riba esenario, òf den forma digital — i pa nan obra yega na nan públiko (ku ta lesa). E fishi di buki den e parti karibense di Reino ta inkomparabel ku esun di Hulanda europeo. Por ehèmpel, aktualmente kasi no tin kas editorial ku ta guia i publiká eskritor riba gastu propio, i e kantidat di libreria tambe ta basta abou. Hopi bia un eskritor ta haña su mes obligá pa e mes tuma enkargo di e proseso di produkshon, inkluyendo distribushon i promoshon di su propio obra. Ku e areglo akí, Letterenfonds ke fasilitá pa un kreadó i un organisashon por produsí su propio obra i logra alkansá un públiko.

Ken ta bin na remarke?

Bo ta bin na remarke si:

- bo ta aktivo komo outor, poeta (di aktuashon), ilustradó, artista di palabra papiá konosí komo ‘spoken word’, artista di slam, traduktor literario òf outor di obra teatral, o sea, dramaturgo.
- komo organisashon bo ta organisá aktividat literario, manera un festival òf evento ku ta promové lesamentu;
- komo organisashon bo ta publiká obra literario, komo buki òf den un proyekto, manera un obra teatral òf un podcast;
- komo organisashon bo ta yuda desaroyá talento ofresiendo guia pa skirbimentu, tradukshon, redakshon (final) òf presentashon riba podio.

Pa kiko por entregá un aplikashon?

E supsidio ta destiná pa diferente inisiativa literario den tur género: novela literario, cuenta kòrtiku, kolekshon di poesia, palabra papiá konosí komo ‘spoken word’, obra di teatro, no-fikshon literario, i literatura pa mucha i hóben. Riba papel, riba esenario, òf den forma digital.

E fondo ta distinguí tres kategoria:

1. *Kreashon di obra literario nobo*

Esaki por enserá un beka di trabou/honorario pa skirbi un teksto literario nobo òf pa gastu di tradukshon di un teksto literario eksistente pa òf for di papiamentu, inkluso pa publikashon multilingual. E petishon por kubri tambe gastu di produkshon di publikashon di buki, inkluyendo redakshon / guia, produkshon, alkanse di / presentashon pa públiko, distribushon, òf gastu di produkshon di proyekto literario interdisiplinario òf multimedia. Por ehèmpel, por apliká pa kubri gastu di redakshon / guia, produkshon, alkanse di / presentashon pa públiko i distribushon.

2. *Desaroyo di talento*

Aki ta trata di desaroyo profeshonal di e kreadó literario. Por ehèmpel, pa establese òf partisipá den tayer òf kurso riba tereno di skirbimentu kreativo i tradukshon literario. Guia individual, mentorado, coaching, enseñansa i trayekto pa train-e-trainer tambe ta kai bou di esaki. Ademas, por apliká pa supsidio pa un plan di investigashon den kua abo, komo kreadó literario, ta eksplorá e posibilidatnan i faktibilidat di bo ambishon literario. Por ehèmpel, desaroyá un idea pa un buki for di un perspektiva di kontenido i artístiko, i tambe for di un perspektiva komersial: ken lo publik’é, ken lo hasi e redakshon, i kiko ta e gastunan di publikashon. Finalmente, gastu di residensia òf gastu di transporte por ta un parti modesto di un petishon pa supsidio.

3. *Aktividat literario*

E supsidio ta pa organisashon ku ta hasi aktividat públiko riba tereno di literatura. Esaki ta inkluí organisashon di festival, kompetensia di skirbimentu, programa literario online i offline, evento di literatura di komunidad, i evento di mikrófono habrí. Esaki por inkluí, por ehèmpel, aktividat pa promoshon di lesamentu ku ta tuma lugá tantu paden komo pafó di klas, pa grandi i chikí, manera den biblioteka.

Un aplikashon por bai tokante diferente kategoria pareu. E aplikante no ta obligá (pero por) limitá su mes na un kategoria.

Kon ta evaluá un aplikashon?

Ta evaluá un aplikashon segun e siguiente kriterionan:

a. *Plan di proyekto*

E evaluashon lo atendé: ophetivo, aktivitat, liña di tempu i resultado ku ta spera di e proyekto. Si un trayekto pa desaroyo di talento ta parti di e aplikashon, e enfoke lo ta riba su propósito i ophetivo. Ta importante tambe pa identifiká e persona(nan) ku lo guia e aplikante durante e trayekto, inkluyendo un splikashon di kon bin a skohe e persona(nan) akí. Por ehèmpel, e persona(nan) akí tin hopi eksperensia? Ora di apliká pa un plan di investigashon, e evaluadó òf konsehero ta wak e ophetivonan di e proyekto, e propósito, e presupuesto, i e balor agregá di e plan pa e kreadó literario.

b. *Balor agregá di proyekto pa e islanan*

Lo evaluá kon i den ki grado e proyekto ta kontribuí na e infrastrukutura literario den Karibe. Por hasi esaki, por ehèmpel, dor di stimulá i promové literatura lokal i oumentá konsientisashon pa esaki. Banda di esei, e proyekto por kontribuí dor di amplia loke e tereno literario ta ofresé pa yega na sierto grupo di enfoke spesífiko manera mucha, hóben, adulto i hende grandi, òf dor di promové literatura den e idiomanan ku e hendenan ta papia na e islanan. Ademas, e akto di ofresé plataforma na eskritor, poeta, artista i otro talento literario pa nan por presentá, desaroyá, produsí i distribuí nan obra por ta relevante pa fortalese infrastrukutura literario.

c. *Profil di aplikante*

Lo evaluá eksperensia i ekspertisio relevante di e aplikante. Lo wak kiko e aplikante a hasi i logra kaba. Esaki ta inklui eksperensia relevante, edukashon, publikashon anterior, presentashon i proyekto literario. Tambe lo wak ku ken e aplikante a yega di kolaborá kaba.

- Aplikante individual: eskritor, traduktor i otro kreadó por simplemente inklui nan kuríkulo òf portfolio ku obra ku nan a krea.
- Organisashon: por splika tokante un eksperensia anterior ku organisashon di proyekto òf aktivitat literario. Por ilustrá esaki ku deskripsjon di un ehèmpel spesífiko i resultado di un proyekto anterior.

d. *Kalidat di redakshon / selekshon di obra / guia / kolaborashon*

Lo evaluá kualifikashon i eksperensia di e redaktornan, e supervisornan òf e partnernan. Lo presta atenshon na kalidat di ekspertisio di e tim òf di e personanan ku e aplikante lo ke realisá su plan kuné.

- Supervisor individual: pa redaktor, maestro, òf persona ku ta guia, por hasi esaki inkluyendo un kuríkulo òf portfolio. Lo evaluá eksperensia i trayectoria di e personanan enbolbí.
- Programa edukashonal i tayer: ora partisipá den un programa edukashonal, kurso òf tayer, mester splika ken ta ofresé esaki i kiko ta eksperensia di e organisashon riba e tereno akí.
- Partner di kolaborashon: ta evaluá profeshonalismo i eksperensia di e partnernan di kolaborashon tambe. Ta evaluá loke e partnernan a hasi òf logra te awor i kon bon nan ta kuadra ku e proyekto di e aplikante.

e. *Mester deskribí grupo di enfoke i aserkamentu di públiko (si ta relevante)*

Si e aplikashon su ophetivo ta pa yega na un públiko, manera publikashon di buki òf aktivitat públiko, mester definí e aserkamentu di públiko i strategia bon kla. Lo evaluá e grupo(nan) di enfoke di e proyekto, inkluyendo e gruponan di edat i e motibu di kon a skohe e grupo di enfoke spesífiko akí.

Ta konsiderá e grado den kua e proyekto ta korespondé ku nesidat i interes di e grupo di enfoke intenshoná i kon e aplikante tin planiá pa yega na i enbolbí e grupo di enfoke akí.

Esaki ta inklui tambe un evaluashon di ku kua partner ta kolaborá pa yega na e públiko i kon e kolaborashonnan akí ta kontribuí na éksito di e proyekto.

f. *Presupuesto (a base di malchi di Nederlands Letterenfonds)*

Un aplikante mester entregá un presupuesto balansá den un malchi spesífiko. Lo evaluá e presupuesto pa determiná si e ta komplemento i realístiko. Esaki ta nifiká ku tur gastu mester ta menshoná klaramente i kalkulá realístikamente. E presupuesto semper ta na euro. No ta aseptá presupuesto den otro moneda, manera dòler òf florin antiano. E fondo por duna supsidio solamente den euro. Ta evaluá e presupuesto pa wak si e ta balansá, loke ta nifiká ku mester tin sufisiente fondo pa implementá e plan. Ademas, ta tene kuenta ku ko-finansiamentu: esaki ta disponibel, i si ta asina, a komprometé na esaki kaba?

Ta evaluá un organisashon pa determiná si e ta ofresé remunerashon na kreadó i stakeholder segun práktika i tarifa komun na e islanan. Pa kreadó individual, e evaluashon ta wak spesifikamente si e aplikante ta ofresé un honorario na su mes i na e eventual persona(nan) ku ta gui'é. Si apliká pa por publiká un buki, lo evaluá e akuerdonan entre e kreadó i e kas editorial / produktor, den kua a akordá por lo ménos e provishonnan relashoná ku e porsentahe òf tarifa di royalties i e lisensia.

Ki ora no por apliká?

No por entregá dos aplikashon pa e mes proyekto. Ademas, no por entregá un aplikashon tampoko si e proyekto anterior sostené bou di e areglo akí no a finalisá ainda. Un aplikante no por entregá un aplikashon si e no ta establesé òf residensiá na Aruba, Kòrsou, Sint Maarten, Boneiru, Sint Eustatius, òf Saba. Kolaborashon ku partner (komersial), manera ku kas editorial òf partner den i pafó di e parti karibense di Reino sí por. Solamente, nan mes no por ta e aplikante.

Kon aplikashon ta funshoná?

Tur aña tin un periodo den kua por entregá aplikashon. Letterenfonds lo anunsiá fecha di inisio i final di e periodo ei riba su website. Riba e website lo publiká e montante máksimo di supsidio pa kada aña kalendarario tambe.

Por entregá aplikashon kontinuamente, te ora ku e presupuesto di e areglo kaba.

Ademas, por entregá aplikashon den e idioma materno di e aplikante. Esaki ta nifiká ku un aplikante por entregá su aplikashon na papiamentu i ingles i pa proyekto na papiamentu i ingles, banda di hulandes, fries, i e idioma di seña hulandes.

Ingles ta permití únikamente pa kreadó den e parti karibense di Reino ku tin ingles komo idioma materno.

Den e areglo akí, ta entregá aplikashon di forma digital (online).

Pa tur aplikashon, ku eksepshon di publikashon di buki, ta posibel pa entregá e plan di proyekto via grabashon di video òf oudio. Durashon máksimo di e grabashon ta den e formulario di aplikashon online. Tambe, semper mester entregá presupuesto riba papel, i semper e mester ta den euro.

Ta entregá e aplikashon usando e formulario di aplikashon online ku tin algun pregunta spesífiko.

Despues ta evaluá si e aplikashon ta kompleto i si e proyekto ta kualifiká pa e areglo. Si ta asina, e petishon ta bai pa por lo ménos un konsehero eksterno di Letterenfonds. E persona akí lo evaluá e petishon riba kontenido.

E meta ta pa yega na un desishon den un plaso di 22 siman despues di a entregá e petishon, basta e ta kompleto.

Promé ku entregá e aplikashon online, e aplikante por tuma kontakto ku personal di Letterenfonds pa kualke pregunta tokante su proyekto, e prosedura, i e proseso di aplikashon pa supsidio.

Ki ora por apliká di nobo?

Por entregá un petishon (ku kontenido) nobo solamente despues di a finalisá e proyekto aprobá anteriormente.

Si un aplikashon no ta kumpli ku e rekesitonan formal, e aplikante lo haña e oportunitat pa drecha esaki. Si despues di esei, ainda e petishon no ta kumpli, lo no prosesa e aplikashon.

Evaluashon

Komo ta trata di un areglo nobo, Letterenfonds lo evaluá e areglo despues di un periodo máksimo di dos aña i lo hasi e adaptashonnan nesario, si mester.
